

# **Badische Landesbibliothek Karlsruhe**

**Digitale Sammlung der Badischen Landesbibliothek Karlsruhe**

## **Historia Zaringo Badensis**

**Schöpflin, Johann Daniel**

**Carolsruhae, 1765**

CCCLXXXI.

[urn:nbn:de:bsz:31-295125](https://nbn-resolving.org/urn:nbn:de:bsz:31-295125)

## CCCLXXI.

FRIDERICUS IV. IMP. CONFIRMAT WILHELMO  
MARCHIONI HACHBERGENSI OMNIA  
JURA ET PRIVILEGIA.

ANNO MCCCCXLI.

*Ex Tabulario Badensi.*

**W**ir FRIDERICH von Gottes Gnaden, Römischer König, zu allen  
Ziten Mehrer des Reichs, Hertzog ze Oesterreich, ze Steyr, ze  
Kärndten vnd ze Krain, Grave ze Tyrol &c. bekennen vnd tun kund offen-  
bar mit diesem Brief allen die ihn ansehen oder hören lesen, das für uns  
komen ist, der Wohlgeborn Wilhelm Marggraf von Hachberg, Herr zu  
Röteln vnd zu Saufenberg, vnser Landvogt im Elsaß, Rath vnd lieber  
Getreuer vnd hat uns demütiglichen gebetten, daß Wir Ihm alle vnd jegli-  
chen sein Privilegia, Handvesten, Briefe, Freiheit, Recht vnd gut Gewon-  
heit, die seinen Vordern vnd Ihm von seliger Gedachtnuß, Römischen Key-  
fern vnd Königen vnsern Vorfahren am Reich verliehen vnd geben worden  
seyn, zu verneuen vnd zu bestäten gnädiglich geruchten. Haben Wir an-  
gesehen solch sein fleißig Beet, auch willig vnd getreue Dienst, die sein  
vordern vnsern vorfaren am Reich getan habend vnd auch er uns vnd dem  
Reich fürbaßer wohl gethun mögen vnd sollen in künftigen Zeiten vnd da-  
rumb mit wolbedachtem Muth, gutem Rat vnd rechter Wissen demselben  
Marggraf Wilhelm solch sein Privilegia, Handfesten, Briefe, Freiheit,

Cod. Dipl. P. II.

C c 2



Recht vnd gut Gewonheit, die sein vordern vnd er von Römischen Kaißern vnd Königen redlich erworben, herbracht vnd behalten haben, vernewet, bestätt vnd confirmiren, vernewen, bestetten vnd confirmiren In die auch von Römischer Königlicher Macht in Kraft diß Briefs mit allen Iren Meynungen, Punckten vnd Articulu, als ob Sie von Wort zu Wort in diesem gegenwärtigem vnserm Brief geschriben wären, getrewlich vnd ohn Geferde. Vnd wir gebieten darumb allen Fürsten, Geißlichen vnd Weltlichen, Grauen, Freyen, Herrn, Dienstleuten, Rittern, Knechten, Hofrichtern, Landrichtern, Richtern, Amtleuten, Urteilsprechern, Burgermeistern, Räten vnd Gemeinden vnd suß allen andern vnsern vnd des Reichs Vndertanen vnd getruwen ernstlich vnd vestiglich mit diesem Brief, daß Sie den vorgenannten Marggraf Wilhelmen sein erben, noch ihr Leute oder Vnderseßen wider solch ihr vorgemelt Privilegia, Brief, Handvesten, Freiheit, Recht vnd gut Gewohnheit vnd diese vnser Bestättung nicht hindern, noch In daran dheinerley Irrung, Insüll, noch Bekümmernuß thun, noch desß jemand andern ze thun gestatten in dheine Weis. Das meynen wir ernstlich. Mit Vrkund diß Briefs versigelt mit vnserm Königlichen anhangendem Insiegel. Geben zu der Newenstatt nach Cristli Geburt vierzehenhundert Jahr vnd darnach in dem Ein vnd vierzigsten Jahr am Montag vor Sanct Lorentzen tag, vnser Reichs im andern Jahre.

(L. S.)